


Хасанов Б.Х.
Аитова Н.Н.
Сұлтан Ж.И.
Садуақас Н.Ә.
Шоқым Г.Т.

1 2016
174Dz

МОНОГРАФИЯ

Профессор Қ.Жұбанов және лингвистикадағы жаңашылдық



*Профессор Қ.Жұбанов және
лингвистикадағы жаңашылдық*

Ақтөбе, 2015

ОӘЖ 811.512.122¹ |

ББК 81.2Каз

П82

Пікір жазғандар:

Филология ғылымдарының докторы, профессор Ә.С.Тарақов .

Филология ғылымдарының докторы, профессор
Н.М.Жанпейисова

Филология ғылымдарының докторы, профессор Тектіғұл Ж.О.

Филология ғылымдарының докторы, профессор А.С.Әділова

*С.Бәйішов атындағы Ақтөбе университетінің Ғылыми кеңесі
ұсынған*

Жауапты шығарушы:

Н.Н.Аитова

**П 82 Профессор Қ.Жұбанов және лингвистикадағы
жаңашылдық. (ұжымдық монография) /Жауапты редактор:
М.Джусупов. Орал, «ГҮЛІМ» баспасы, 2015. – 114 бет**

ISBN 9965-771-38-3

Ұжымдық монография – казақ ғалымдарының бірлескен авторлықпен шығарған ғылыми басылым. Монографияда Қ.Жұбанов зерттеулеріне қатысты соны пікірлерімен, ғалымның тіл біліміндегі ізденістеріне жаңаша көзқарас түрғысынан пайымдау жасайтын ғылыми тұжырымдарымен тартымды зерттеу жұмыстары топтастырылған. Қазіргі лингвистикада үшінөзекті болып табылатын тіл ғылымы саласының мәселелеріне қатысты ұсыныстар жасалады. Монография филолог мамандарға, филология бойынша білім алушыларға, тілге қызығушылығы бар жалпы оқырманға арналған.

ОӘЖ 811.512.122

ББК 81.2Каз

ISBN 9965-771-38-3

© Хасанов Б.Х., Аитова Н.Н., Сұлтан Ж.И.,
Садуақас Н.Ә., Шоқым Г.Т., 2015

Мазмұны

Алғы сөз.....	4
1. ПРОФЕССОР Қ.ЖҰБАНОВ ЖӘНЕ ТЛ ТЕОРИЯСЫ МӘСЕЛЕЛЕРІ	
1.1. Хасанов Б.Х. Қ.Жұбанов ізденистерінің теориялық негіздері.....	6
1.2. Аитова Н.Н. Қ.Жұбанов және грамматикатеориясы мәселелері.....	23
1.3. Сәдуақас Н.Ә. Қ.Жұбанов және қазақ тілі фонетикасы.....	42
2. ПРОФЕССОР Қ.ЖҰБАНОВ ЖӘНЕ ОНЫҢ ЗЕРТТЕУЛЕРІНІҢ ҚАЗІРГІ ТЛ БЛІМІ МӘСЕЛЕЛЕРІМЕН ҮШТАСТЫҒЫ	
2.1. Сұлтан Ж.Қ. Жұбанов зерттеулеріндегі тіл мен мәдениеттүтасымы және бүгінгі лингвомәдениеттаннымың жекелеген проблемалары.....	64
2.2. Шоқым Г.Т. Қ.Жұбановтың гендерлік лингвистикалық пайымдаулары.....	101
ҚОРЫТЫНДЫ.....	112

АЛҒЫ СӨЗ


Кезінде ғылым саласының бастауларында ғасырлар бойы маңыздылығын жоймайтын, уақытпен бірге жаңғыра беретін, ізіне үңілген сайын келер үрпақ тың ой, терең пайымдау, жаңа білім табатын ғұмырлық еңбектер қатарында аталған Қ.Жұбанов еңбектерінің зерттеу көзі ретінде талай ғалымдардың назарын аудартуы ерекше мазмұндық күндылығымен байланысты. Сондай-ақ, зерттеушілер осы уақытқа дейіноны әр қырынан тануға, Жұбанов пайымдауларының ілімдік өзегін табуға, заман қажеттілігіне сай лингвистикалық ойлау кеңістігінің аумағында ізденіс жасауда іргелі теориялық дәйек ретінде қолдануға тырысып келеді. Сөйтеп тұра ғалым еңбектерінің білім-таныммен бірге жасап, жасаң қалып танытусыры ғажап бір дүние-сынды. Бұл оның көрегендік танытып, алдағы лингвоғылымитаным коюжиегін сүзіп өтіп шыққандығынан ба әлде заман тынысына сай тілтаным тамыршысы болып туылғандығынан ба, әйтеуір, бір керемет – үздік шығармашылық үлгі. Зерделі жүртқа ұсынылып отырған ұжымдық монография қазіргі ғылыми парадигмаға сай лингвистикалық зерттеу бағыттарының Қ.Жұбанов зерттеулерімен сабактастырын айқындайтын бірліктерлес, пікіртендес ғалымдардың ізденістерін бір кітапқа тоғыстырып, одан әрі ізденіске шақырады.

Осы кезеңдегі тілтанушылық білімнің бастауында болған тұлғалардың өзіндік үлесі оку-агарту, ғылым саласында қаншалықты екенин анықтау қажеттілігін ескерсек, қазақ тіл білімі ғана емес тіл теориясы дамуына өз үлесін қосқан ғалым Құдайберген Куанұлы Жұбановтың ерен еңбегі бір тәбе. Өлшеуі көзге көрінбейтін нәрселер жөнінде айтқанда, жарнама сөземес, объективті ғылыми білімге негізделген ақиқат қана жеміс бермек.

ХХ ғасырда ұлттық тіл білімінің ғылыми негізін салған отандық жалпы тіл білімінің көзін ашқан, тілдік пайымдаулары ХХI ғасыр тілтанымына тамырын жайған ғалымның үш түрлі білім парадигмасы желісіндегі лингвистикалық пайымдаулары тіл тарихы сахнасында өз мәртебесін жоймақ емес. Бұл ұсынылып отырған монография да – осының айғағы. Әрине, тіпті бұл енді ғана тууы тиіс жаңа әрі ұлттық мазмұндағы

ғылыми зерттеу жұмыстарының түрткісіне де айналар. Қалай болғанда да жаңа кітап ғалым Қ.Жұбановтың тіл теориясындағы жаңалықтарының ғұмырылық белсенділігінің мәнін ашуды көздейді. Оқырман қауымға сапары он болғай.

M.Джусупов
Өзбек Әлем тілдері университетінің профессоры,
филология ғылымдарының докторы
Ташкент қаласы



1. ПРОФЕССОР Қ.ЖҰБАНОВ ЖӘНЕ ТІЛ ТЕОРИЯСЫ МӘСЕЛЕЛЕРІ

1.1. Қ. Жұбанов ізденістерінің теориялық негіздері

Бақытжан Хасанұлы

*Абай атындағы Қазақтың ұлттық
педагогикалық университетінің профессоры,
филология ғылымының докторы*

*Қазақстан Республикасы
Алматы қаласы*

Қазақстан үшін магистратура, докторантуралар даму жолына түсken кезде тіл теориясы бойынша ғылыми ізденістер аса қажет. Біз жұбановтану бойынша жеке кітаптар да, мақалалар да жарияладық. Ғылым жолына түсken жас ғалымдар үшін бұрынғы материалдардың кейбіреуін пайдалана отырып тағы да Құдекенің теориялық тұжырымдарына назар аудармақпyz.

Отандық тілтану ғылымының даму барысында Жұбановтанудың мәні зор. Дәлірек айтқанда, Қ. Жұбанов пайымдаулары теориялық тұрғыдан зерделене түсіу тиіс. Жұбановтану ғылымы лингвистикалық, педагогикалық, әдебиеттану т.с.с. сипатты болып келеді. Жұбановтану ғылымы — көпқырлы ғылым, оның лингвистикалық нысаны, қысқа кайырғанда, тіл теориясы, адамның қарым-қатынас құралы, тіл жүйесі және оның сөйленімдік (речь) жүзеге асуы.

Әлбетте, Қ. Жұбанов зерттеулері қазақ тіліне арналған, бірақ ол қазақ тілі негізінде, оны басқа сан алуан тілдермен салыстыру арқылы, тіл теориясына қадам басқан. Бұған ғалымның зерттеулері дәлел болады. Ол—ол ма, ғалым өзінің “Қазақ тілінің ғылыми курсы жөнінде лекциялар” атты еңбегін “...қазақ тілі, оған жақын тілдерді, жалпы тіл ғылымы жүйесін тексерген жұмыстардың жалпылаңқырап алынған, популляр (жария) түрде тізілген ...корытындысы...”¹ ретінде сипаттайды. Көріп отырғанымыздай, Қ. Жұбанов мұраларын тіл білімі салалары бойынша бағалау керек. Ғалымның мұрасын әлемдік лингвистика даму үрдісімен байланыста қарастырсақ, ол әр кырынан жақутша жалтырап көрінетін анық.

¹ Жұбанов Қ. Қазақ тілі жөніндегі зерттеулер. Алматы. 2010. 37-бет.

XXI ғасыр лингвистерінің мәдениеттік лингвистика (лингвокультурология), психолингвистика бойынша жариялаған оқулықтарына назар аударсак, олардың кейбіреуінің лебізі мен Құдекен зерттелулері өзара байланыс табатыны байқалады. Мысалы, қазіргі орыс тіл білімпаздары санатындағы В.А. Маслованың 2008 ж. жарық көрген ЖОО студенттеріне арналған оку құралы атауы — “Современные направления в лингвистике”. Демек, тіл білімінің басты бағыты — тілдің жалпы мәселелері: “В центре внимания современных направлений в лингвистике — общие вопросы языка”² дейді ол. Ал атақты психолингвист Р.М. Фрумкинаның пайымдауынша: “Быть лингвистом — ... значит размышлять на общие темы”³.

ХХ ғасырда даму жолына түскен “Жалпы тіл білімі” соғы кезде “тіл теориясы” деген ғылыми мамандықты қамтиды.

Қазақ тілі еліміздегі магистранттар мен докторанттардың оқу тілі болғанмен, бұл тілде жаңа сипатты тіл теориясы бойынша оларға арналған оқулық әлі жоқ. Қысқасы, Қ. Жұбановтың тіл теориясы бойынша бастаулары көпшілік тарапынан жалғасын тапқан жоқ.

Ғылым — әлеуметтік институт. Тіл болмысы жөнінде объективті, жүйелі ұйымдастырылған, негізделген білім жасауға бағытталған танымдық қызметтің ерекше және бірегей түрі — тілтаным. Ал тілтанымның ұйытқысы — *лингвистикалық әдіснама, әдіс, амал-тәсілдер, ұстанымдар*. Қ. Жұбанов осы мәселеге ерекше мән берген: “Ғылым да — адам санасының жемісі, адам тәжірибесінің қорытындысы, — дейді. — Бұл уақытқа шейін көрнекі орын ұстап келген тіл ғылымы үнді-европа тілдерін зерттеген, сол зерттеу ісінде белгілі “әдіс тудырған” ғылым. Бұл кезге шейін басқа тілдерді зерттеушілер де осы үнді-европа тіл ғылымының басшылығымен, осының әдісімен зерттегендіктен, бұлардың әдісін де үнді-европашыл әдіс деп атайдыз”⁴, — деген еді. Фалым өзіне дейін арнайы сез болмаған осы бір мәселелерге көпшілік назарын аударған. Ол Төрекулулы Нәзір “Жат сездер туралы” кітапшасында

²Маслова В. А. Современные направления в лингвистике. М.: Академия, 2008, 3-бет.

³Мына кітап бойынша: Маслова В. А. Современные направления в лингвистике. М.: Академия, 2008. 3-бет.

⁴Жұбанов Қ. Қазақ тілі жөніндегі зерттеулер. Алматы, 2010. 45-66-беттер.

“тұтынған методологиясымен өзінен бұрынғылардан ұзап кете алмады”⁵ деп атап көрсетті. Сондай-ак үнді-европа тіл білімінің негізін салушы Франц Боппқа әділ баға бере келіп, “үнді-европа тіл ілімі жүз жыл бойы дыбыстарды ғана тексерді, онда да дұрыс қорытынды шығара алмады”, — деді.

Қ. Жұбанов пайымдаулары замандастары, тағдырластары ой-пікірлерімен үндес келеді. Мысал ретінде орыс лингвистикалық терминдер энциклопедиялық сөздігі негізін салған дарынды ғалым Николай Николаевич Дурново еңбектерін алуға болады. Бұл ғалым өзінің грамматикалық сөздігінде былай деп жазды: “Народный язык”. В противоположность литературному языку и другим общим языкам, как напр., общегосударственному, церковному и пр. н. я. наз. живой язык народных масс, известный только в устном употреблении как разговорный или как язык произведений устной словесности. Являясь по б.ч. средством общения лишь между близко живущими друг от друга частями народа, н. я. распадается на областные или местные говоры, ограниченные по б.ч. сравнительно небольшой территорией и отличающиеся друг от друга не только благодаря территориальной разрозненность населения, но и благодаря различиям в быте населения и окружающей его обстановке, и отличается меньшей устойчивостью, чем литературный язык...” Қ. Жұбанов та “Халық тілі дегеніміз — сол диалектілердің жинағы” деп туындареді.

XXI ғасырдың Тіл біліміне кіріспесінде “халық тілі” термині қолданылады: “язык (народности и нации) — совокупность диалектов, языковые различия между которыми” могут определяться как собственно лингвистическими, так и социальными факторами”. Міне, бұл да Қ. Жұбановша сөйлеу.

Тілдің даму заңдылықтары мен тілдік өзгерістерге әсер ететін ішкі, сыртқы себептер мен себепкерлер болатынын ғалым дұрыс пайымдайды. Осы ретте ол қоғам мен тілдің өзара байланысу, бір-біріне тәуелді болу заңдылықтарын әдістемелік (методология) қағида ретінде басшылықта алған, әр түрлі әдістер қолдана отырып, материалдар жинайды, оларды

⁵Сонда. 34-бет.

⁶Сонда. 50-бет.

сұрыптайды, топтайды, солардың негізінде теориялық түжырм жасайды.

Ғалымның жалпы тіл білімі теориясын дамытарлық түжырмдары тіл, сөз, сөйлеу, сөз бен ой, сөйлем туралы ғылыми-теориялық пайымдауларынан көрініс береді. “..Тіл дегеніміз шартты ғана болып табылады”⁷, — дейді.

Қ. Жұбановтың пайымдауынша; “Сөз деген - зат біткеннің бәрінің аты емес, әр елдің өзінің білген затының, білген құбылысының ғана аты”⁸. Кез келген тілге тән әмбебап белгі - сөз, көріп отырмыз, сөздің атаулық қызметінен туындаған.

Арнаулы әдебиетте сөзге мынадай анықтама беріледі: “Слово — основная структурно-семантическая единица языка, служащая для именования предметов и их свойства, явлений, отношений действительности, обладающая совокупностью семантических, фонетических и грамматических признаков, специфичных для каждого языка”⁹. Осы анықтамаға ғұламаның сөзге берген анықтамасын “Алайда” сезін қосып ілестіре берсе, өте орынды болар еді.

Қазіргі жалпы тіл білімі оқулықтары мен бағдарламаларында тіл қызметі, сөз қызметі, сөйлем қызметі деген мәселелер арнайы қозғала бермейді. Ал профессор Қ. Жұбанов бұл жайларды әдейі әлеуметтік-лингвистикалық түрғыдан сөз еткен. Ол: “Тіл адамдар арасында, ол — адамның өз ойын жеткізу, сөйлесу құралы”¹⁰, — дейді. Ғалым тілдің атқаратын қызметін бұдан басқаша да баян еткен. Құдекен арнайы сөз еткен (өзі қойған) тақырып — “Сөз өзгешілігі мен сөз қызметі”. Ғалым: “Тіл элементі атап қызметін өтесе, сөз болғаны; егер хабар беру қызметін өтесе, сөйлем болғаны. Бұл келтірілген екі түрлі өзгеше қасиет барлық сөздерге де тән, ейткені олар әрі номинативтік, әрі коммуникациялық қызмет атқарады. Сөздің бір басында екі функция (қызмет) болады: бірінші - хабар беру қызметі, коммуникация функциясы; екінші - таңбалau қызметі, норматив функция не сигнификация”¹¹.

⁷Жұбанов Қ. Қазақ тілі жөніндегі зерттеулер. А. 2010. 98-бет.

⁸Сонда. 151-бет.

⁹Лингвистический энциклопедический словарь. Главный редактор В. Н. Яриева. М. 1990. 464-бет.

¹⁰Жұбанов Қ. Қазақ тілі жөніндегі зерттеулер. А. 2010. 126-бет.

¹¹Сонда. 99-бет.

“Сөз хабарласу үшін керек, егер осы керекке жарамаса, ол — сөз емес”¹², — дейді. Сөйлеу хабарласқанда, әр нәрсенің аттарын (номинативтерді) құрап, хабар беріледі. Осылайша номинативтерден құралмай жасалған хабар жок. Ат болмаса сөз де болмайды¹³.

Құдекенше: “Әр сөз — өз алдына жеке ұғым (представление)”¹⁴. Ол “... сөз дегеніміз—заттың (құбылыстың) аты + байланысу құралы. Сөз заттың атын ғана емес, басқа нәрсе мен құбылыстарға қандай қатынасы барлығын қоса білдіретін сілтеулер; сөз жалаң ұғым емес, күрделі ұғым. Сілтеу амалы мен сөздің басқаларға қарым-қатынастары тілтілде түрліше болуы мүмкін”¹⁵, — дейді. Сонымен қатар ғалым сөз бен ойдың сәйкес келмейтін реттері (акылсыз адамды “осы кісі ақылды!” деу), ұндемей сөйлеу тәсілі де болатынын (сталиндік конституция жөнінде шет мемлекеттерінің ұндемей қалуы - сынаудың бір түрі) байқатқан¹⁶.

Ғалым сөз қызметіне байланысты былай дейді: “Тілдің өзіндік өзгешелігі - затқа ат қою, ол аттарды бір-бірінен айыру. Мысалы: жылқы — түйе емес, қой — сиыр емес, сиыр — жылқы емес. Атаулардың мағынасын осылайша айыруды — **сигнификация** дейміз. Әр нәрсенің өзін жеке көрсету, даралап айту қасиетіне ие болған сөз зат, сипат, құбылыс аттары болып қалыптасқан. Бұл аталғандар — тілдің негізгі өзгешеліктері. Тілдегі осы айтылған ат қою мүмкіншілігін **номинация** дейміз. Тілдің бұдан басқа тағы бір негізгі қызметі — хабар беру. Оның бұл өзгешелігін **коммуникация** дейміз. Оның мағынасы орысша — общение, қазақша — қауымдасу, хабарласу дегенді білдіреді. Номинация — атау, номинат. — ат, номинатив—атаушылық. Номинатив функциясы - стабил (тұрақтылық)”¹⁷.

Құдекен “**Атты неге қоямыз?**” деген сұрақ береді де, өз сұрағына өзі «Оны заттардың өздері жоқ жерде сөз қылу үшін қоямыз»¹⁸, - деп жауап қатады және әрі қарай “нәрсенің, сипаттың бәрі түгел қасымында болса, онда сөзді шығын

¹²Сонда.

¹³Сонда.

¹⁴Сонда. 107-бет.

¹⁵Сонда.

¹⁶Сонда. 98-бет.

¹⁷Сонда. 99-бет.

¹⁸Сонда.

қылмай-ақ ымдап ете шығар едік, сонымен де бірталай хабар берер едік”¹⁹, — деп сөзін аяқтайды. Бұдан әрі “...тілде заттың ұғымы бар, мәні (сущность) жоқ”²⁰ деген тұжырым жасайды.

Неге атау әр түрлі болып келеді? Бұған Қ. Жұбанов “Қазақ тілінің жоғарғы курсы» (“Дәрістері») бойынша арнайы берілген “Функциональная семантика” (Атқаратын қызметіне қарал затқа ат тағылады) деген тақырыптағы әңгімесінде жауап берген: “Кұбылыс көп және олар әр түрлі; бір халық оның, бір заттың бір сипатын біліп, екінші жағын білмейді; мұның үстіне біреуін көп, екіншісін аз біледі. Содан келіп атауда түрлілік, көптік туады”²¹ деген ғалым сөзі құлаққа қонады. Ғалымның “Зат пен құбылысқа тағылатын аттардың қалай пайда болуы мен олардың мағыналарының өршуі”²² жөніндегі пайымдауларында әлем тілдері семантикасына ортақ қасиеттер де сипатталады.

“Сөйлеу дегеніміз — белгілі бір заттың, істің сыйпаттың аттарын белгілі тәртіппен тізіп, бірімен-бірін байланыстырып барып, солар арқылы хабар беру”²³ деген тұжырымы көңілге қонады дегіміз келеді.

Қ. Жұбанов, сонымен қатар, лексика, семасиология, синтагматика, грамматика т.с.с. бірсызыра лингвистикалық ұғымдарға²⁴ дұрыс түсінік берген.

Ғалым “Ескі тіл тану ғылыми, шынында да, фонетиканы дыбыс жайындағы ғылым деп танитын”²⁵ дейді де, мұны сыйнайды, сейтеді де “фонетика - дыбыс тілі дыбыстарының тілдік қасиеттерін тексеретін ғылым...”²⁶ деген анықтама береді.

Бұғынгі арнаулы әдебиетте: “фонетика — раздел языкоznания, изучающий звуковую сторону языка”²⁷ делінген. Бұл анықтама Құдекенің “фонетика тіл дыбысы болған жердің бәрін қарай бермейді, дыбыс тілінің дыбыстарын ғана тексереді”²⁸ деген ескертпесі тұрғысынан алғанда, көңілге қонбайды.

¹⁹Сонда. 100-бет.

²⁰Сонда.

²¹Жұбанов Қ. Қазақ тілі жөніндегі зерттеулер. А. 2010. 96-бет.

²²Сонда. 93-бет.

²³Сонда. 109-бет.

²⁴Сонда. 102-бет.

²⁵Сонда. 38-бет.

²⁶Сонда. 42-бет.

²⁷ Большой энциклопедический словарь. М. 1998. С. 554.

²⁸Жұбанов Қ. Қазақ тілі жөніндегі зерттеулер. А. 2010. 38-бет.

Ғұламаның шығармашылық еңбектерінен біз байқаган басты ерекшелік сол — ғалым ана тілі мәселесін сөз ету үшін әдетте тіл-тілге тән әмбебап заңдылықтар қандай — соны алдымен сөз етеді де, содан кейін оны қазақ тілі материалымен ұштастырады. Мысалы, ғалым “Буын жігін қалай табуға болады?” деген еңбек жазғанда алдымен “1. Буын жүйесінің маңызы” деген мәселені қытай, араб, еврей тілдерін тілге тиек ете отырып, уақыт факторымен байланыста алып баяндайды. Содан кейін “2. Біздегі буын түрлері”, одан әрі “3. Буын жігі қайткенде онай табылады?” деген тақырыпта ой толғап, кенес береді²⁹.

Жалпы алғанда, ғалым **адам мен тілдің, адам мен лингвистиканың** байланысу тетігін көре білді. Мәселен, адамның өз тіліне әсер ете алатынын дұрыс түсіндіреді: “Человек, как активное животное, могущее воздействовать на свою жизнь, может активно воздействовать и на свой язык, но для этого требуется не только одна письменность, а целый ряд социально-экономических условий ...”³⁰, — дейді ғалым. Бұл айтып отырғаны — тіл дамытуға әсер ететін әлеуметтік факторлар.

Ғалымның **семиотикалық түрғыдан**, тілді таңба ретінде сипаттау жөнінде де өз пікірі болмаса, “Сонау Аристотельден бастап, көпке аян болған, осы күнге дейін буржуазия ғалымдары қайталап айтып келе жатқан кисын бойынша тіл дегеніміз шартты таңба ғана болып табылады. Олай болса, біз айтып отырған табиғи тілден басқа хабарласу амалдарының берін де тіл ретінде тануымыз керек болмай ма?!”³¹ — деген сауал қоймас еді. Демек, -Күдекеңше, тілді таңба ретінде сипаттауды нақтыламақ керек.

Қ. Жұбанов шығармашылығында да **аударма** жалпы тіл білімі нысанасындағы құбылыс әрі әдебиеттану мәселесі ретінде көрініс береді. Жалпы тіл білімі бойынша, аударма—бір табиғи тілдегі мәтінді мазмұны жағынан дәл келтіріп екінші тілге балама етіп беру іс-эрекеті және соның нәтижесі³².

²⁹Сонда 365-375-беттер.

³⁰Сонда . 501-бет.

³¹ Сонда . 98-бет.

³²Марчук Ю. Н. Автоматический перевод // Большой энциклопедический словарь. Языкознание. М. 1998. С. 15.

Қ. Жұбанов — аударманың өзекті мәселелеріне ерекше көңіл бөлгөн ғалым³³.

Бір қызығы, әнді ғалым тілге байланыстырады. Осы ретте оның “тіл-тілге ортақ ән де бар, әр тілдің өзіне меншікті басыбайлы әні де болады”³⁴ дегені еске түседі. “Одағайдың дыбысталуы” жайында сез ете отырып, ол ән тілде көңіл райын білдіру үшін қажетті амалдардың маңыздысы”³⁵, — деп нақтылады.

Күллі тіл атаулының даму тарихында ортақ белгілер болуы да заңдылық, бұл — жалпы тіл білімі құзырындағы мәселе. Құдекен пайымдауында, тіл тарихын білу жалаң мақсат емес, тілді менгеру мен өзгерту үшін керек: “Тілдің тарихын білу деген сез — оның өніп-өскен жолын білу деген. Әлбетте, тіліміздің сонау ұзак жолда қандай өзгерістерге ұшырағанын білу керек. Бұрынғыны білу жай әшейін мақсат емес, тілді менгерудің амалы”³⁶, — дейді ғалым, Құдекен ойынша: “Біз тілді менгеріп болғанымыз жоқ, толық менгерсек қана оны дұрыс бағытта өзгерте аламыз”³⁷. Демек, мемлекеттік тілдің, әсіресе оның ішкі құрылышын (мысалы, термин қоры мен жүйесін) тиісті дәрежеде дамыта алмай келе жатқанымыздың бір белгісі, әлеуметтік қажеттілікке сай, толық менгерге алмағанымыз. Қазақ тілі жүйесін ғылыми түрфыда толық менгерге алмауымыз жоғары оку орындарының қазақ тілін оқыту ісін жетілдіруді қажет ететінін андатады.

Ғұламаның “Қазақ тілі ғылымын бір адам ғана жасай алмайды, бір мезгілде ғана ол жасалмайды. Бұл — көп күш, көп қол, көп уақыт керек қылады...”³⁸ деген пікірінен жеке тіл ғылымы жөніндегі тұжырымның жалпы тіл біліміне енгізуге болатыны туындағанын байқау қын болмаса керек.

Тіл мен жас ерекшелігі байланысы — социолингвистикалық мәселе. Тіл мен жас мәселесі қазақ тіл білімінде өзара байланыста арнайы зерттелмеген, қаралмаған, бірақ бұл тақырыпты алғашқы меңзегендердің бірі — Құдайберген Жұбанов. Ғалым “Қазақ тілінің ғылыми курсы

³³ Қара: Бакытжанова А. К. Қ. Жұбанов және аударманың лексика-семантикалық проблемалары // Жұбанов тәгіншылығы. Ақтөбе. 1998. 143-147-беттер.

³⁴ Жұбанов Қ. Қазақ тілі жөніндегі зерттеулер. А. 2010. 72-бет.

³⁵ Сонда. 130-бет.

³⁶ Сонда. 120-бет.

³⁷ Сонда.

³⁸ Сонда. 37-бет.

жөнінен лекцияларында” (“Қазақ тілінің фонетикасы” кесегінде) тіл мен ұлт, тіл мен ұлтшылдық, тіл мен жастар мәселелері байланысын қозғайды.

Ғалым “беріде қазактың өз ішінен шығып, қазақ тілін зерттегендер қазактың ескі оқығандары болды. Олар — Байтұрсынұлы Ахмет, Кеменгерұлы Қошке, Омарұлы Елдес, Шонанұлы Телжан, Досмұхамбетұлы Халел...”³⁹

“Беріде қазактың өз ішінен шығып, қазақ тілін зерттегендер қазактың ұлтшыл оқығандары, алашордашылары болды [...]. Беріде жастардан Басымұлы Қажым, Аманжолұлы Сәрсен сияқты тіл мәселесіне белсene қатынасқандар шығып отыр. Бұлар, әрине, ілгері тілек жастар ғой, ілгеріде ауыз тұшығандай нәтиже ”берер деп дәмеленеміз. Әзірге бұлардан да конкрет зерттеу қорытындысын көре алмадық [...]”⁴⁰, — дейді ғалым. Осы орайда екі мәселені атап айтқан жөн. Біріншіден, Қ. Жұбанов үміт артқан ойдаған шәкірттері жоғары жетістіктерге жетті. Құдекең есімін атаған жас ғалым Басымов Қажым Аманғалиұлы (1896— 1939) қазақ тіл білімін өркендетуге зор еңбек сіңірді. Оның баспаға басылған елуғе жуық еңбегі болды. “15 жыл бойы қазақ тіл білімінің әр түрлі мәселелерімен шұғылданып, артында алуан түрлі еңбектер қалдырып кеткен Қажекенің есімі қазақ тіл білімі тарихында мәңгі сақталмақ”⁴¹.

Ал Сәрсен Аманжолов 30-жылдардың өзінде жергілікті тілдік ерекшеліктерді алғашқы зерттеушілер мен орта мектепке оқулық жазушылар қатарында болды. Соғыс жылдарының өзінде (1941 — 1945 жж.) Қ. Жұбанов шәкірттері С. Аманжолов пен І. Қеңесбаев докторлық диссертацияларын қорғады. Бұлар ғалымда жоғары атак-дәрежелерге жетті. Осы ретте І. Қеңесбаевтың “Қазақ тілінің фразеологиялық сөздігін” (Алматы, 1977), С. Аманжоловтың “Вопросы диалектологии и истории казахского языка” (Алма-Ата, 1959) еңбектерін аса зор ризашылықпен атап керек. Осы орайда айта кеткеннің артығы болмас, Құдекенің кіндігін тараған ұл-қыздарының бәрі ғалым ретінде елімізге танымал. Балалары ғылым докторлары Есет пен Асқар ғылымның биік жетістіктеріне жетіп,

³⁹ Сонда. 34-бет.

⁴⁰ Сонда. 34-35-беттер.

⁴¹ Қараныз: Сарыбаев Ш. Қазақ тіл білімі мәселелері - Алматы: Арыс, 2000. 592-596-беттер.

Күдекеснің ізін басты. Ал немересі ғалым Ардақ Күдекен мұраларын зерттеу ісін ұйымдастыруда ез үлесін қосуда.

Қ. Жұбанов сияқты, қазіргі тіл теориясы да адам мен тілдің жас ерекшелігін өзара байланысты қарастырады.

Баршаға белгілі швейцар лингвисті Фердинанд де Соссюрдің (1857 — 1913) “Жалпы лингвистика курсы” атты еңбегі ғалым дүниеден озғаннан кейін 1913 ж. жарық көрді. Әлемдік лингвистика бойынша алғанда, тұңғыш рет осы еңбекте тіл мәнбілерін талдау жүйелі түрғыда жүзеге асты. Замандастары мұны тусіне алмай, сынаумен болды. Өйткені олар жаңалықты түсінбей, замандастының лингвистикалық идеялары түрғысынан бағалады. Құдайберген Жұбанов Соссюрді жақсы түсінді, оның атына әділ сын пікір де айтқан.

Ф. де Соссюрше “тіл — элеуметтік мәнбір” (француз тілінен аударылған орысшасы: “язык есть факт социальный”). Алайда “Курстың” соғы қорыттынды сейлемі: “лингвистиканың бірден-бір және ақиқат нысаны іштей өзінше және өзі үшін қарастырылатын тіл” (“... основной мыслью этого курса: единственным и истинным объектом лингвистики является язык, рассматриваемый в самом себе и для себя”).

Профессор Қ. Жұбанов Ф. де Соссюрді “тіл білімінде элеуметтік бағыт ұстаған әйгілі Женева мектебі деген көрнекті мектептің адамы. Ф. де Соссюр — “синхроническое языкознание” деген бағыттың негізін салған ғалым. Аталған бағыт тілдің бір дәүірдегі қалпын ғана қарайды. Осы идеяға берілген ғалым әр заманда тіл жүйесі әр басқа болады деген жаңсақ көзқараста болды. Оның қателігі тілді еш уақыт өзгермейтін қатып қалған зат деген түсініктен туған,” — дейді. Бұдан әрі Қ. Жұбанов еңбектерінде “синхроника”, диахроника мәселелеріне тоқталады. Ғалым сөзінің дұрыстығы сол — қазіргі тілтаным оқулықтарында тілдің тарихи дамуының белгілі бір кезеңдеріндегі қалпы (синхрония) да, тіл жүйесінің тарихи дамуын тілді оның уақыт шенберіндегі даму үрдісінде (диахрония) қарастырылады.

ХХ ғасырдың 80-жылдарынан бастап Соссюр ізімен ез бетінше зерттеуді ұсынғандарға, тіл болмысының сыртқы жағдайымен шектелушілерге социолингвистикалық түрғыдан, сондай-ақ американ структурализміне, тіл элеуметтік құбылыс

ретінде сипатталып, теориялық тойтарыс берілді, тілді “өзінше және өзі үшін” зерттеуге болмайтыны дәлелденді. Сондай-ақ тіл — таңба жүйесі, ал таңба жүйесі тек қана өзгереді, дами да алмайды, жетіле де алмайды деген “тұжырымдама” да құрықталды. Осы ретте тілді халықпен, шындық өмірмен байланыстыра зерттеген, тілдің әлеуметтік табиғатын аша білген Кенес социолингвистерінің еңбегін атап көрсету керек⁴².

Профессор Қ. Жұбанов Ф. де Соссюрді “тіл білімінде әлеуметтік бағыт ұстаған... “синхроническое языкознание” деген бағыттың негізін салған ғалым. Аталған бағыт тілдің бір дәуірдегі қалпын ғана қарайды. Осы идеяға берілген ғалым әр заманда тіл жүйесі әр басқа болады деген жансақ көзқараста болды. Оның қателігі тілді еш уақыт өзгермейтін қатып қалған зат деген түсініктен туған,” — дейді. Қ. Жұбанов “синхроника”, диахроника мәселелеріне тоқталады. Ғалым сөзінің дұрыстығы сол — қазіргі тілтаным оқулықтарында тілдің тарихи дамуының белгілі бір кезеңдеріндегі қалпы (синхрония) да, тіл жүйесінің тарихи дамуын тілді оның уақыт шенберіндегі даму үрдісінде (диахрония) қарастырған.

XXI ғасыр лингвистикасы тіл мен сөйленімді (речь) жеке-жеке тұжырым ретінде де, өзара байланыста да қарастырады. Қ. Жұбанов та осылай пайымдай келіп, “сөйлеу — хабар беру, коллективтік көрініс. Бұған ең азы екі адам қатысуы керек. Ұжым болып қатынасудың (хабарласудың) басқа да амалдары бар. Тіліміздің олардан айырмасы не? Хабар қалайша, қай жолмен беріледі? — мәселенің түйінді жері, міне, осы екеуі”, — дейді.

Қазіргі, XXI ғасыр лингвистикасы парадигмалары Ф. де Соссюрден бастау алған тілді құрылымдық бірліктерден (элементтерден) тұратын таңбалық жүйе ретінде қарастыратын, яғни пәні тіл болып есептелген құрылымдық лингвистика (структуральная лингвистика) ілімі пайда болды, оның шаруасы өткен ғасырдың екінші жартысында (жартысының басында) бітті, сол себепті тіл лингвистикасы зерттеулері орынын сөйленім лингвистикасы (лингвистика речи) зерттеулері басты.

Қазіргі тіл туралы ғылым сөйленім лингвистиканың жалпы және ортақ пәнін анықтау жолында ізденісте. Ізденіс

⁴²Будагов Р. А. Язык — реальность — язык — М.: Наука, 1983.

үстінде “Адам қатынасының мақсаты қандай, тілді не үшін қолданады?” деген сұрақ қойылуда.

Қ. Жұбанов бұл сұраққа сол кездің өзінде дәл қазіргі психолингвистік, социолингвистік жауап берген болатын: “Тіл — бір адам үшін керек емес, тіл жеке адам үшін жасалған нәрсе.” “Тіл деген не? дегендеге алдымен осыны ескеру керек”⁴³, — дейді ол.

“Бір тілмен сөйлесу үшін адамдар бір-бірімен аралас болуы керек, істес болуы керек”⁴⁴, — деген еді ғалым.

“Біздің бірөңкей қазақша сөйлеуіміз неліктен?” деген сұрақ қойып, оған “ол атамыз бір болғандықтан емес. Ата-тегі түрліше болса да, бір тілде сөйлейтіндер аз емес...”⁴⁵ дей келе “...тіл бірлігі неден?” деген сұрақ қойып, оған “Адам — қоғамның үйіншігі емес, ұжым. Мұны ескеру қажет”⁴⁶, — деп қазіргі социолингвистік жауап береді.

Қазақстанның тілдік даму стратегиясын жүзеге асыру тетіктерін жасау барысында, атап айтқанда, қазақ-орыс-ағылшын үштілділігін дамыту, жаңа әліпбіге көшу қайшылықсыз болуы үшін Қ. Жұбановтың лингвистикалық пайымдаулары ескерілуі тиіс.

Қ. Жұбанов жазуды жақсарту арқылы тіл дамыту мәселесін алға тартты. Жаңа әліпби қабылдау үшін Кеңес Одағында Бүкілодақтық жаңа әліпби орталық комитеті құрылды, оған кавказ тілдері маманы Николай Феофанович Яковлев (1892 — 1974) басқарды. Ол “Әліпби құрудың математикалық формуласы” деген мақала жариялады. Осыған байланысты ғалым «куллі тілдер үшін әліпби жобасын «ойлап шығарған Яковлев деген профессорды «дилетант» деп атай отырып, былай дейді: «...он обосновал письменность «математически сформулированного алфавита» применительно к латинской графике. Что же касается существа дела, то премудрая «математическая формула построения алфавита» была лишь ученым plagiatом. Это была перевоплощенная в математику казахская система сокращения

⁴³ Жұбанов Қ. Қазақ тілі жөніндегі зерттеулер. Алматы, 2010. 92-бет.

⁴⁴ Сонда.

⁴⁵ Сонда.

⁴⁶ Сонда. 92-бет.

букв, созданная для заметения следов, как и сознавался сам Яковлев»⁴⁷.

Иә, таңба, таңбаландыру - тіл дамытудың әлеуметтік лингвистикалық факторы және ол тіл дамытумен тәжеудің пәрменді жолы. Бұл ретте К. Жұбановтың екі пікірін айрықша атаған жөн.

1. К. Жұбановша, сөйлеушілерінің басын біріктіретін - жазу, бірақ ол үшін жазу бұқаралық сипат алуды тиіс. Ол былай дейді: “До тех пор пока масса не взяла в руки власть, она (письменность) не могла быть массовой, а [...] являлась принадлежностью верхушек. Поэтому она не и не могла распространяться и объединить языки масс. В дальнейшем можно будет в связи с тем, что письменность будет массовая, объединить в одну письменность и язык, но одной письменностью объединить языки нельзя. Человек, как активное животное, могущее воздействовать на свою жизнь, может активно воздействовать и на свой язык, но для этого требуется не только одна письменность, а целый ряд социально-экономических условий, которые могут объединять не только тюркские языки, но в дальнейшем все языки мира, но пока об этом нечего думать. Если мы вступим на путь этимологического письма, у нас получится такое же явление, какое имеется в английской письменности и в ряде других письменностей”.

...Мы не можем надеяться на то, что с переходом на морфологический принцип правописания возможно будет унифицировать письменность, а главное - языки. Я тоже сторонник унификации, но здесь нужны особенно осторожные меры.

Казахское лар имеет четыре начертания, мы не можем отказаться от них и перейти к І (лр). Это затруднит обучение первоначальной грамматике, а в дальнейшем также саму грамотность. Чтобы не писать безграмотно, начертание должно быть приближено к произношению. Иначе требуется зазубривание всех графических форм, как было у русских с «ять» у русских»⁴⁸.

⁴⁷Сонда. 507-бет.

⁴⁸Жұбанов К. Казак тілі женинде зерттеулдер. Алматы, 2010. 501-бет

2. К. Жұбановша, орфография мәселесін тілші шешкен емес, өмірдің өзі шешкен. Ол былай дейді: «Возьмите любую письменность у культурных народов. Несмотря на то, что у них имелись крупные лингвисты, они мало помогли построению орфографии, потому что до сих пор лингвистика являлась чистой наукой». В дальнейшем она должна помогать и практическому письму.

Арабское правописание основано на историческом принципе правописания. Оно было продиктовано не невежеством арабов, а являлось результатом особенностей арабского языка. Собственно, арабская филология была настолько развита, что современная фонетика [...] мало опередила арабскую фонетику, которая существовала несколько сот лет тому назад. Эта самая ассимиляция и диссимилияция давно были известны, и, пожалуй, наши мугалимы хорошо знают об этом и помнят, что такое ^{أَدَغَ} (ихфа, идгам). Но не этой арабской филологией были выработаны принципы арабского правописания, их выработала природа арабского языка, имеющего трехсогласный корень и бедность гласных. Все это обусловило морфологический принцип»⁴⁹.

Құдекең «Біз емлені ермекке түземейміз, оқайлансын деп түзетеміз»⁵⁰ деген.

К. Жұбанов - латын әліпбій қолдаған ғалым. Құдекең айтып кеткен, сол бір кездегі зорлықпен болған әліпби ауыстырудың тауқыметін бүгін біз тартып отырмыз. Сондыктан да күн тәртібіне жазу ауыстыру мәселесі қайтада қойылып отыр. Осы бір аса жауапты істің оң шешімін табуы үшін К. Жұбановқа кеңеске келмек керек. Біздіңше; жазудың қандай ма түріне көшсек те Қазақстанды мекендерген барлық ұлттың, әсіресе орыстардың бірге көшуін ұйымдастыру шарт. Әйтпесе қазақ халқының орыстілді, қазактілді болып жіккө бөлінуі бекі түседі, қоғам ыдырайды.

Ең бастысы, қандай әліпби қабылдамайық, біздің тіліміздің дыбыстық жүйесі қаз қалпында сакталуы тиіс.

Қазақ фонетикасын зерттеуші А. Байтұрсынұлы, Ж. Досмұхамедов, К. Жұбанов ана тілінің дыбыс жүйесін

⁴⁹Сонда . 502-бет.
⁵⁰Сонда . 349-бет.

кекірек көзімен түйсіну әдісін қолдана отырып, қазакы фонетика ғылымының негізін салды⁵¹. Бұл жолда үшеуі де аянбай күресті. Мысалы, Қ. Жұбановша: “Үндестік заңы ...дышыстардың ...ымыраласуы”⁵². Ол қазақ тілінің іргелі үндесім зандылығын сақтауға атсалысты: “...объявление войны против сингармонизма, как часто поступают ученые мужи из ВЦКНА (Всесозный Центральный комитет нового (латинизированного) алфавита — Б.Х.), равносильно объявлению войны против агглютинативного строя так называемых урало-алтайских языков”⁵³, — деді.

Қазіргі фонетистер Қ. Жұбановтың қазақ тілі мен буын тілге жатады деген пікірі түркологияға қосылған жаңа үлес ретінде бағалауда⁵⁴.

ХХ ғ. соңғы ширегінде үндесім фонетикасы қалыптасты.

Қазіргі жаңа әліпби ауыстыру түсінінде қазақ тілінің дыбыс құрамының ғылыми сипаттамасы жасалды, үстем тілдер теориясының ықпалынан құтылу мүмкіндігі туды. Жаңа әліпби социолингвистикалық тұрғыдан, әсіресе социофонетикалық негізде жасалуы тиіс.

Қазақ ғалымы үндіеуропа тілдері ғана емес, басқа тілдер жанұясына жататын ондаған тілдер материалдарын, тіл тарихымен байланысты материалдарды молынан пайдаланып, жаңа пайымдаулар ұсынды. Сондықтан да жаңа мынжылдықтың салыстырмалы-тарихи тіл білімі Жұбанов зерттеулерімен үндес.

Корыта айтқанда, Жұбановтану ғылымы жоспарлы түрде дамуы тиіс, өйткені ол тіл білімінің тарихи дамуының әдіснамалық негізін салуға, қазақ лингвистикасының қазақ тілінде дамуына бір ғасыр tolған тұста тіл туралы білім үлгілері (парадигмасы) ауысуының себептерін анықтап, ұлттық тіл мен мәдениеттің байланысу үдерісін дұрыс пайымдалап, қоғам қажеттілігіне қаншалықты байланысты екенін, қоғамның тілді пайдалануын саналы түрде үйлестіруге септігін тигізсе керек. Бұл үшін студенттер мен магистрант, докторанттар ғалымның еңбектерін түпнұсқадап оқуы тиіс. Отандық білім мен ғылым, қажеттілікке сай, қазіргі кезде жүйеге түсірілуде.

⁵¹Жұнисбек Ә. Казак фонетикасы. – Алматы: Арыс, 2009. 7-бет.

⁵²Жұбанов Қ. Қазақ тілі жөніндегі зерттеулер. А. 2010. 365-бет.

⁵³Сонда. 537-бет.

⁵⁴Жұнисбек А. Введение в сингармоническую фонетику. – Алматы: Арыс, 2009. 46-бет

Қ.Қ. Жұбанов еңбектері арқылы алдыңғы аға буын қалай тәрбиеленсе – кейінгі толқын жаңа заманның толық тұлғасына солай айналмақ.

Қ. Жұбанов идеялары ықпал етпеген бұрын-соңды қазақ тілі білімлаздары болмаса керек. Ал тіл теориясы бойынша оған оның тұстастары да, кейінгі буын тілшілер де қарыздар десек, еш артық айтқандық болмайды.

Қазақ “сын түзелмей, мін түзелмейді” дейді. Қ. Жұбанов идеяларымен қаруланған бүгінгі ұрпақ әлемдік тіл теориясына қазақ тілі материалдары негізінде өз үлесін қосары анық.

Тұрасын айтсақ, Қ. Жұбанов еңбектері үнемі “Қазақ тілі жөніндегі зерттеулер” деген атпен жариялануда. Бұл — дұрыс емес. Фалымның өзі айтпай ма: “... Мұндағы жазылғандар ... қазақ тілі, оған жақын тілдерді, жалпы тіл ғылымы жүйесін тексерген жұмыстардың... қорытындысы” еді . Ендеше, Қ. Жұбановтың келесі еңбектер жинағы “Қазақ тілі және жалпы тіл ғылымы жөніндегі зерттеулер” деп аталуы тиіс. Фалымның келесі жинағында қолжазбалары мен қолтаңбалары (автографтары) толық қамтылуы тиіс, соның негізінде “Қ. Жұбанов тілі сөздігі” жарияланса, көне!

XIX ғасырдың басынан (1816 ж.) жаңа бағытта даму бағытын анықтаған әлемдік тіл білімі өткен ғасырда жаңаша қарқын алды, ал XXI ғасырда білім үлгісі (парадигмасы) ауысуы барысында жан-жақты дамуда.

Қазіргі білімнің бастауында болған ғалымдардың үлесі оқу-ағарту, ғылым саласында қаншалықты екенін анықтау талап етіле бастады. Міне, осы тұрғыдан келгенде қазақ тіл білімінің дамуына өз үлесін қосқан ғалым — Құдайберген Қуанұлы Жұбанов. Қазіргі отандық тілшілер қауымы “Қ.Қ. Жұбанов қосқан үлестің көлемі, салмағы, маңызы қандай?” деген сұрақ қойсa, қане. Жауап дамыған инстинкт, объективті ғылыми білімге негізделуі шарт. Біріншіден, лингвистикалық ілімнің даму тарихында тіл зерттеудің стратегиялық бағыттары анықталуда, дәстүр мен жаңалықтар негізінде “Қазіргі тіл білімі” үғымы нақтылануда. Тілтанымның өз алдына ғылым ретіндегі даму барысында көптеген жаңа бағыттар пайда болуда, олар саралануы тиіс.

Баршаға аян, XX ғасырда ұлттық тіл білімнің ғылыми негізін салған Құдайберген Қуанұлы Жұбанов отандық жалпы

тіл білімінің көзін ашты және оның пайымдаулары XXI ғасыр тілтанымына тамырын жайды. Ғалымның салыстырмалы-тарихи лингвистикалық пайымдаулары тарихи ұстанымға негізделген **лингвистикалық компаративизм** парадигмасына, керек десеңіз, қалыптасу үстіндегі **жүйелі-құрылымдық** парадигмаға дөп келеді. Ғұлама еңбектері қазақ тілі, түркі тілдері мен шетел тілдері материалдарына негізделген пайымдауларға мол қаныққан, оның **біртұтастық** пен **жүйелілікке** құрылған еңбектері — осы тұжырымыздың кепілі. Сонымен қатар Қ. Жұбановтың пайымдаулары мен атауға байланысты тұжырымдары бүгінгі әлем тіл білімінде белгі бере бастаған **когнитивтік** парадигмаға ұласады. (Айта кетелік, бұған ғалымның “Тіл дыбыстарының табиғатын қалай танып келдік, қалай тануға тиіспіз?”, “Тіл дыбыстарын бұлай танып келуіміздің себептері” деген дәрістері толық дәлел бола алады).

Ғалымның әлеуметтік **лингвистикалық** сынды пайымдауларына, ісжүргізу сияқты ғылыми-практикалық мәні зор ескертпелеріне де назар аудармақ керек.

Қорыта айтқанда, Қ. Жұбановтың теориялық пайымдаулары **лингвистикалық ілімдер тарихына** енгізіліп, қазіргі тіл теориясы елегінен өткізілуі тиіс.

